



Il president dil Cussegl naziunal Martin Candinas ei staus a Salaplauna el Center d'agricultura Surselva e ha discurreu a moda viva da siu mintgadi.

FOTOS SUSI ROTHMUND

Era Martin Candinas sa buca far striegn

Il venderdis sera vargau ei Martin Candinas, il president dil Cussegl naziunal, staus hosp el Center sursilvan d'agricultura a Mustér. El ha relatau a moda eloquenta, viva, frestga e divertenta da sia lavur e siu engaschament politic – e rispundiu da tuttas damondas dil publicum.

SUSI ROTHMUND/FMR

«Jeu sun dapi l'entschatta commember da voss'uniun», ha *Martin Candinas*, il president dil Cussegl naziunal declarau suenter il cordial beinvegni da *Giusi Flepp*, il president dall'uniun dil Center sursilvan d'agricultura (CSA). Sco Candinas ha schau sentir, tonscha la pedu buca per esser in commember activ, mo avon la radunonza generala seperstgisi el mintg'onn. Martin Candinas ha nezegiau la caschun per engraziar aunc ina ga per la beingartegiada fiasta e la gronda honur ch'ei vegnida demussada enviers el a caschun da sias fiastas el vitg claustral ed ella vischnaunca da Sumvitg. «Il pli bi eis ei stau en claustra a Mustér», ha il president dil Cussegl naziunal declarau ed igl ei aunc adina stau da sentir con fetg che quella fiasta uffiziala ella baselgia claustrala ha fatg plascher e commentau el.

Heicli d'integrar il romontsch

Il punct culminont dalla sessiun vargada ei l'elecziun dil Cussegl federal che ha giu liug l'entschatta da december stada per el. «Il pli heicli ei stau d'integrar il romontsch, fetg bia ei numnadamein protocollau e dau avon», ha Martin Candinas explicau ed aschuntau che las elecziuns dil Cussegl federal erien aunc mai avon vegnidas menadas consequentamein en treis lungatgs. Ei seigi stau ina brava sfida ed el hagi decidiu da commentar sez per tudestg e romontsch. Il resultat en lungatg franzos vegneva daus enconuscent separadamein. «Nus havein trenau da dar enconuscent ils resultats en treis lungatgs aunc la damaun cun cedels ufficials. Mo jeu tradeschel buc sch'ils nums sin quels eran ils medems sco quels dils elegi.» Ch'el hagi fatg quei aschia e consequentamein era per romontsch hagi procurau per biaras reacziuns positivs ed el smarvegli aunc adina ch'ei hagi buca dau dapli critica.

A Delémont el cantun Giura hagi el allura teniu in plaid per la Cusseglia federala *Eli-sabeth Baume-Schneider*: «Quei hai jeu fatg per franzos. Senza trenar enzacontas gadas fust quei buc iu.» Ils plaids stoppi el buca scriver sez, per quei hagi el persunas dil fatg. «Jeu sun ualti critics ed adateschel secapescha ils plaids, cul temps san ei plaunent tgei ch'jeu vi ed ils davos hai jeu bunamein saviu surprendre in tier in.»

Plitost arbirer che schef

Tier ses pensums s'audi ei da menar las sessiuns e per exempel mirar ch'il temps da plidar vegni tenius en. «Jeu sun plitost in arbirer ch'in schef», ha el manegiau riend silla damonda tgei influenzas ch'el hagi sillas tractandas. Las structures seigien dadas avon e la fuorma da tener sessiuns a Berna seigi unica sil mund. In sistem ch'el beneventi. Ella Casa federala retscheiva Martin Candinas era bia visetas da gruppas, sco per exempel dall'Uniun da commerci e professiun da Mustér. Fetg savens seigi el era envidaus ad occurrenz e sentupadas, re-



Il publicum ha tedlau cun interess ed era nezegiau la pusseivlad da tschentar damondas a Martin Candinas.

«Ei dat naturalmein adina discussiuns, perquei che la mesadad ei d'in auter meini – en tals muments ston ins star luc.»

Martin Candinas, president dil Cussegl naziunal

tscheivi ambassaduras ed ambassadurs en Casa federala ni fetschi visetas egl exteriur. Aschia meinan ses viadis per exempel el Chile ed en Brasilia, el Vietnam ed a Singapur. El hagi era visitau in giug da hockey sin glatsch cun ambassadurs. Previda seigi plinavon ina viseta tier la guardia papala a Roma. «Tgirar tut quels contacts ei zun impurtont per omisdus varts. Jeu sai denton decider nua ch'jeu vi ir e nua buc», aschia Martin Candinas. Avon duas jannas eis el staus presents ad ina conferenza da «Crypto-Finance» a S. Murezi e l'jamna vargada ha el entupau politicras e ministers da tut il mund al WEF a Tavau ed ei staus envidaus alla tscheina cun *Klaus Schwab*. «Jeu vesel biars munds totalmein differents.» Questa stad ha Martin Candinas previu da far ina spassegiada alla Tgina dil Rein ensem cun ambassadurs

dallas tiaras spel Rein. La stad vegni el plinavon a far ina tura cun velo naven dil pass Alpsu entochen a Basilea e visitar enteifer ovg dis ovg cantuns. Ils 24 da mars 2023 vegni ei per l'emprema ga a dar sut sia egida ina sessiun dad impedi. 44 persunas cun impediment vegnan a prender part.

«Jeu astgel dir nuot»

Sco igl ei stau d'intervignir a Salaplauna, ei il fatg ch'il president dil Cussegl naziunal astga buca politisar ina nusch detg dira per Martin Candinas. Bugen havess el rispundiu allas damondas dalla FMR davart la tenuta dalla Svizzera en connex cun l'uiara en l'Ucraina e sch'ei seigi ina bun'idea da vuler contonscher la pasch cun furnir armas. «Ti stos capir, jeu astgel dir nuot», ha el puntuau e stuiu morder sils dents. Era la damonda tgei ch'el manegi dalla situaziun actuala cun *Alain Berset* ha el astgau commentar sulet cun «il president dil Cussegl naziunal fa in onn buca politica».

Cu la sentupada a Salaplauna ei stada a fin, ha il davos en sala saviu che Martin Candinas fetschi lu puspei paleis siu meini tier ils differents temas naven dils 4 da december 2023. Sco president voteschi el era buc davart las fetschas che vegnan tractadas durant las sessiuns, hagi denton la vusch da tagl sch'ei fetschi basegns – e quei seigi stau ella sessiun d'unviern duas gadas il cass. «Quei dat naturalmein adina discussiuns, perquei che la mesadad ei d'in auter meini – en tals muments ston ins star luc», ha Martin Candinas explicau ed aschuntau riend che tut quels che hagian manegiau ch'ei hagian gronda pussonza a Berna hagian mai giu grond success. Era il pensum dil president dil Cussegl naziunal vesa el realistic: «Sco president ston ins buca manegiar ch'ins sappi far striegn.» Tuttina tgiri el per exempel ton sco pusseivel ils contacts enteifer la tiara e culs presidents dils parlaments ed ils ambassadurs dalle autras tiaras. El hagi constatua: «Nus cuschinein mo cun aua e quei fan era tschels.»

ILANZ/GLION

Alice Bertogg ha demissionau

Ella vischnaunca dad Ilanz/Glion dat ei in'elecziun complementara per la suprastanza communal. Quei ha la suprastanza communal Ilanz/Glion fatg da saver el Fegl official Surselva dil venderdis vargau. Cun quei che la commembra da suprastanza *Alice Bertogg* da Sevgein ha demissionau, ei in'elecziun complementara necessaria. Sin damonda dalla FMR ha Alice Bertogg declarau d'haver demissionau ord motivs famigliars. Quei pass hagi ella fatg suenter liunga ponderaziun. L'elecziun dil niev commember ni dalla nova commembra da suprastanza succeda tenor art. 31 al. 1 lit. a dalla constituiziun communal entras la cuminoza dalle votantas e dils votants all'urna. Quell'elecziun complementara ha liug dumengia, ils 18 da zercladur 2023. Entrada en uffeci ei igl emprem da fenadur 2023. Sco la suprastanza communal scriva el Fegl official Surselva, datti negin termin d'annunzia per candidaturas, quellas ein pusseivlas entochen il davos di. L'administraziun communal publicheschi candidaturas che vegnien annunziadas ad ella tochen ils 20 da fevrer 2023 el Fegl official Surselva. (fmr/sr)

LAAX OPEN

Ragetti ha gudignau a casa

Andri Ragetti astga selegrar dalla victoria a casa. A caschun dil Laax Open ha il skiunz da Felm numnadamein gudignau claramein ier, dumengia, la cuorsa da freeski slopestyle. Sco RTR ha rapportau, ha *Andri Ragetti* gudignau avon igl American *Alexander Hall* ed il Norvegese *Birk Ruud*. Pìl campiu mundial dil 2021 ei quei l'endschavla victoria ella



Andri Ragetti – il victur ella categoria freeski slopestyle.

FOTO SRF

cuppa mundiala. Il final dalle dunnas da freeski slopestyle ei vegnius annullaus pervia dalla nebla e nevada. Era pils umens ein las relaziuns dall'aura stadas ina brava sfida. Aschia ha *Andri Ragetti* detg suenter il final enviers SRF ch'el havevi atgnamein in'uter plan e hagi stuiu adattar quel pervia dall'aura e las cundiziuns da neiv. Mo gest quella habilitad fetschi ora il bien skiunz e quei hagi el saviu mussar al Laax Open. (rtr/fmr)

TUJETSCH



Il Maraton dalla Surselva a Sedrun en Val Tujetsch che havess giu liug dumengia, ils 29 da schaner 2023, ha stuiu vegnir annullaus per munconza da neiv.

FOTO MARCO HARTMANN

Il Maraton dalla Surselva ei annullaus

Il Maraton dalla Surselva, la cuorsa populara da cuorsa liunga a Sedrun en la Val Tujetsch, ha stuiu vegnir annullaus. Il motiv ei la munconza da neiv.

L'annullaziun ha il comite d'organisaziun dil Maraton dalla Surselva decidiu biebein diesch dis avon il termin dalla cuorsa (La FMR ha gia rapportau il venderdis vargau, mira LQ dils 20 da schaner 2023). Il maraton havess giu liug la dumengia, ils 29 da schaner 2023. Las cuorsas d'affons e giuvenils dil Nordic Cup pon perencunter vegnir realisadas la sonda, ils 28 da schaner 2023. Quei ha *Guido Friberg*, il president dil comite d'organisaziun dil Maraton dalla Surselva declarau il venderdis vargau enviers RTR. Sco *Guido Friberg* ha puntuau, fetschi ei en mintga cass mal da stuer annullar la cuorsa: «Per l'ina essan nus dapi il settember vid l'organisaziun e preparaziun dil maraton. La finfinala va ei denton era pils sportists che fan cuorsa liunga e prendan part ming'onn da nies maraton. Igl ei naturalmein buca bien sch'ins sto dar giu ina cuorsa ella regiun.» Spustar il Maraton dalla Surselva sin in termin pli tard, sco ei vegni fatg culla cuorsa populara Planoiras a Lai, seigi buca stau pusseivel ed era negina opziun. Gia avon dus onns ha il Maraton dalla Surselva stuiu vegnir annullaus, lezza ga denton pervia dalla pandemia da corona. (rtr/fmr)